



Durante un transporte historico via laman

ATCO a hiba casi mil ton di concrete riba De Palm Island



Durante un transporte historico via laman

ATCO a hiba casi mil ton di concrete riba De Palm Island

ORANJESTAD – “Esaki ta pa prome bes den historia di ATCO cu nos ta haci algo asina.... danki Dios tur cos a bai bon”, esaki tabata e prome reaccion di Ing. Robert Carrasquero, miembro di gerencia di ATCO ayera mainta. Nan tabata para na pier di De Palm Island y tabata mira con nan trucknan di Ready Mix tabata crusa lama, abordo di e barco Don Andres, pa hiba concrete riba De Palm Island. E trabounan riba De Palm Island tin algun tempo caba andando, pero den fin di siman tabata asina leu cu mester a bai over na transporta concrete riba e isla pa por a basha un vloer pa un waterslide grandi cu nan ta trahando. Pa esaki ATCO a prepara pa algun dia largo pa por sigura cu henter e proceso di specialmente e transporte for di tera pa De Palm Island ta bai sin ningun problema.

Ayera diadomingo for di 2’or di marduga a cuminsa cu e proceso di preparacion na e planta di ATCO mes na Dakota. A transporta tur ekipo necesario na waf di Barcadera y tabata pa 4:45 di marduga cu e prome 6 trucknan di Ready Mix a yega riba e isla sin problema. Pa 10:30 di mainta henter e trabou aki tabata tras di lomba.

Pa por a realisa e trabao aki, ATCO a haci uso di no menos cu 12 truck di Ready Mix cu a haci mas cu un trip for di tera pa e isla y vice versa. Tambe a transporta no menos cu 3 pump truck grandi riba e isla y 2 truck cu ta carga blokki. Separa di concrete, mester a transporta un cantidad di blokki y pallet tambe for di tera pa e isla. Na tur, Ing. Robert Carrasquero di ATCO ta calcula mas o menos 960 ton di concrete a keda transporta for di tera pa De Palm Island.

“Ta un trabao hopi grandi esaki tabata cu a rekeri no menos cu 25 empleado di ATCO for



di marduga caba riba pia y un adicional 75 otro empleadonan mas pa duna un man den procesamiento di e concrete unabez cu e ta basha”, asina Ing. Robert Carrasquero a duna di conoce. Ela bisa cu tempo cu ATCO a traha riba Sonesta Island nan a hiba e ekiponan di traha concrete riba e isla, pero e biaha aki a opta pa traha e concrete na nan facilidatnan na Dakota y transporte cu nan trucknan di ready-mix pa De Palm Island.

“Nos ta hopi contento con e trabao a desaroya su mes y ta masha orguyoso cu De Palm Island a deposita nan confiansa den e produccion y e personal capata di ATCO”, Ing. Robert Carrasquero a finalisa bisando.

Foto: For di Helic-Tours Aruba, J.Quandus

